

Мотивациялық Хат

Сәлеметсіздер ме, менің есімім Әмина. 2F1 тобының студентімін. Қазіргі кезде өзімді Құндылық министріне ұсынудамын. Өзімді бұл орынға ұсынуымның басты себебі - колледждегі ортақ құндылықтарды нығайтып, студенттер арасында бірлік пен өзара сыйластықты арттыруға өз үлесімді қоссам деймін.

Жалпы не себепті мен дәл “Құндылық” министрлігін таңдадым? Шынында мен түрлі ортада болдым, түрлі адамдарды кездестірдім. Барлығынан үйренерім көп болды және ең маңызды үйренген дүнием - айналадағы орта саған қатты ықпал етеді: сенің құндылығы жоғары, адамгершілігі мол болуың немесе теріс жолға түсуің. Сол себептен де мен өз ортамды, яғни колледж студенттерінің студенттік өмірлерін барынша құндылығы жоғары әрі жарқын ортада өткізгенін қалаймын және өзім де соған ықпал етушілерден болғым келеді. Әсіресе колледжімізге жаңа түскен 1-курс студенттерімен ерекше жұмыс істесем деймін, яғни олардың колледжімізді жақсы жағынан танулары, колледжден тек жақсы құндылықтар мен тәлім-тәрбиені бойларына сіңірту де менің жауапкершілігіме кіреді деп санаймын.

Мен кішкентайымнан ұжымдық жұмысқа көп қатыстым. Мектеп кезінен бастап түрлі волонтерлік іс-шараларға қатысып, белсенділік таныттым. Осы тәжірибе мені әрқашан жаңа ортада жауапкершілікті алуға дайындады. Сондықтан құндылық министрлігінде қызмет ету – мен үшін әрі жаңа мүмкіндік, әрі өз қабілетімді шыңдаудың жолы.

Мен өзімді белсенді, бастамашыл және ұйымдастырушылық қабілеті бар адам деп есептеймін. Әрқашан жаңа идея ұсынып, оларды жүзеге асыруға тырысамын. Бұған дейін колледжішілік мәдени іс-шараларға қатысып, түрлі командалық жобаларда жұмыс істедім. Дебат ойындарына қатысып, түрлі адамдармен тіл табысуды, қарым-қатынас жасауды үйрендім. Ал волонтерлік іс-шаралар арқылы қоғамдық орта үшін бір адамның өзінің қаншама пайда тигізе алатындығын, үлкен қарт кісілерге, кішкентай балаларға, жануарларға мейірім көрсетудің қаншалықты маңызды екендігін түсіндім. Осы арқылы адамдармен тіл табысуды, пікірлерді тыңдауды және ортақ шешім қабылдауды үйрендім.

Мен “Құндылық Министрі” ретінде қандай жұмыс атқара аламын?

Құндылық министрі ретінде бірнеше бағытта жұмыс істегім келеді. Біріншіден, студенттер арасында бірлік пен өзара құрметті арттыру мақсатында «Құндылық апталығы» жобасын ұйымдастыруды жоспарлаймын. Бұл аптада әр күнді бір құндылыққа арнап (мысалы, достық, құрмет, мейірімділік, жауапкершілік), сол күнге арналған челленджер, акциялар өткізуге болады.

Екіншіден, қайырымдылық іс-шараларын дәстүрге айналдыруды мақсат етемін. «Қайырымдылық жәрмеңкесі», «Жақсы іс күні», «Мейірімділік эстафетасы» секілді жобалар әр студенттің қоғамға пайдалы іс атқарып, өз құндылығын көрсетудің тамаша мүмкіндігі болмақ. Осыған орай, ең жақсылық көп жасаған топқа “Ең ұжымшыл топ”, “Ең құндылығы жоғары топ”, “Ең белсенді топ” деген секілді марапаттауларды беру арқылы олардың жақсылық жасауға деген ынталарын арттыруға болады.

Үшіншіден, колледжде мотивациялық орта қалыптастыруға көңіл бөлгім келеді. Аптаның басында «Мотивациялық тақта» орнату арқылы студенттер немесе тіпті мұғалімдер апта бойына тақтаға өздерінің жылы лебіздерін, тілектерін не мотивация

беретін сөздер арқылы басқаларды шабыттандыруларына болады. Бұл студенттердің қарым-қатынастарын жақсартып көңіл-күйін көтеретін, жақсы ойлауға шақыратын жаңа бастама деп санаймын.

Сондай-ақ, студенттердің белсенділігін арттыру мақсатында жыл сайын «Қайырымдылық жәрмеңкесін» өткізуді жоспарлаймын. Бұл жәрмеңкеде студенттер өз қолымен жасаған бұйымдарын, тағамдарын немесе шығармашылық жұмыстарын ұсына алады. Жиналған қаражат мұқтаж жандарға, балалар үйіне немесе әлеуметтік жобаларға бағытталады. Мұндай шаралар студенттерді бірлікке, жанашырлыққа және жауапкершілікке тәрбиелейді.

Тек бұлар емес, сонымен қатар мынадай іс-шараларды да қосуға болады:

«Құндылықтар жайлы бейнеролик» – әр топ шағын видео түсіріп, достық, сыйластық, жауапкершілік туралы ойларын шығармашылықпен жеткізеді.

«Ұлттық құндылықтар күні» – қазақтың салт-дәстүрі мен ұлттық мәдениетін дәріптеу, басқа ұлт студенттерінің де мәдениетін таныстыратын болады.

«Ризашылық қорабы» – студенттер бір-біріне жылы лебіздерін жазып, ай соңында хаттар иелеріне таратылады. Бұл іс-шаралар негізінен студенттер арасындағы қарым-қатынасты жақсартып, оларды жақсылыққа бастау.

Құндылық министрі ретінде басты мақсатым – колледжімізді студент үшін тек білім алатын орын ғана емес, сонымен қатар рухани дамудың, ортақ мәдениеттің және достық қарым-қатынастың ортасына айналдыру. Менің бастамаларым арқылы студенттер өздерін қоғамның маңызды мүшесі екенін сезініп, өзара қолдау мен ынтымақтастықтың маңызын түсінеді деп ойлаймын.

Бұл қызмет маған көшбасшылық қабілетімді шыңдауға, жаңа тәжірибе жинауға және ең бастысы, ортақ құндылықтарды дәріптеуге мүмкіндік береді. Мен әрдайым колледжіміздің дамуына үлес қосуға дайынмын және қызметімді үлкен жауапкершілікпен атқарамын деп сендіремін.

Сөзімді қорыта келе, құндылық министрлігіне деген ынтам мен ниетім – ортақ құндылықтарды дәріптеп, студенттерді бірлікке шақыру, әрқайсысының бойындағы жақсы қасиеттерін ашуға жағдай жасау. Егер осы қызметке лайық деп тапсаңыздар, бар күш-жігерімді салып адал еңбек етуге дайынмын.

Құрметпен,

2F1 тобының студенті-Жайлау Әмина